

## 五五、須達多乘象勸化緣

佛在舍衛國祇樹給孤獨園。時彼城中有一長者。名曰須達。以百千金錢。布施於佛。而作是念。如我今者。財富無量。雖以祇桓精舍百千金錢。布施佛僧。不足為難。今若勸化貧窮下賤。減割針縲（正）。而用布施。乃名為難。復得無量無邊功德。作是念已。即便往白波斯匿王。尋便然可。即遣臣佐。於其城內。擊鼓唱令。語諸人言。須達長者。今欲勸化眾人。以修惠施。於七日頭。乘大白象。於四道頭街巷里陌。處處勸化。時諸人等。心懷歡喜。競共布施。或以衣服瓔珞金銀寶物。種種環玠（正）針縲領帶。隨家所有。持用布施。爾時有一貧窮女人。客作三月。得一張氈。須用作衣。見須達長者勸化諸人。即便問於其傍諸人。彼須達長者。多財饒寶。無所乏少。乃能見於地中伏藏。今何所乏。乃復從人而行乞索。諸人語言。今彼長者。實無所乏。為憐愍故。勸化眾人。欲共修福。請佛及僧。時此貧女。聞是語已。心懷歡喜。而作是言。由我先世不布施故。今為貧窮。今若不施。後世遂劇。復自思惟。佛世難值。我今

雖欲請佛及僧。為無所有。我今身上。唯此一疊。若用布施。裸形而坐。設不用者。後無所望。我今窮苦。會當歸死。寧捨此疊。持用布施。作是念已。即以此疊。於窗牖中擲與須達。須達得已。遣人往看。見貧女人裸形而坐。時彼使者。而問之言。汝今何故。用衣布施。貧女答言。我畏來世。遂更貧劇。以是之故。持用布施。時彼使者。具以事狀。往白須達。須達聞已。歎言。奇哉。即脫身上所著服飾。用施貧女。貧女得已。心懷歡喜。我今布施。現得果報。況將來世。遂經數日。貧女命終。生忉利天。便自念言。我造何福。得生天上。尋自觀察。知在人中。極為貧窮。以疊布施。故得來生此。我今當還報佛之恩。及以須達。頂戴天冠。著諸瓔珞。莊嚴其身。齎持香花。下供養佛。及須達多。前禮佛足。卻坐一面。佛即為其說四諦法。心開意解。得須陀洹果。遶佛三匝。還歸天上。時諸比丘。於其晨朝。前白佛言。昨夜光明照曜。如來為是釋梵四天大王二十八部鬼神大將。佛告諸比丘。亦非釋梵諸神王等。乃是須達勸化貧女。以疊布施。得生天上。來供養我。是其光耳。佛告諸比丘。欲知彼時貧窮女人者。今此天子。是爾時諸比丘。聞佛所說。歡喜奉行。